

Maasai

Engoitoi e'nJeunoto

Ore poki'rorei lo'IKigerot neitubulu engAi.

Amu eishu ororei le'ngAi, neitoki aitaa engolon, neitoki api alang olalem opi imbat pokira are, nerem, neor engishui, o oltau o'robat o indolo, nelelek te'iyolounoto, o endamunoto o'Itau. Heb 4.12

Ore ororei lai nemaaitoki arinyokino pesho, kake keitabaiya nena naiyeu nanu, nelo aitumunyan ina'bae nairiwaka metaasa. Isa 55.11

Embolokinoto o'rorei linono, napik oltungani ewangan, nepik olmodai engeno. Zaburi 119.180

Engitobirunoto e'ngop.

Te'ngiterunoto eitobira engAi shumata, o engop. Gen 1.1

Neitobiraki indokitin poki te ninye; naa tene me ninye anata metii endoki nabo naitobiraki. Johana 1.3

Engitobirunoto o'Itungani.

Neitobir engAi oltungani te'mpukunoto enye makewan, te'ngitanyanyukoto e'ngAi eitobira ninye; eitobira olee, o engitok. Gen 1.27

Neitobir olAitoriani oltungani te'nderit e'ngop, neitoki akutaki engianget engume enye, entooma e'ngishui; neako keata oltungai oltau oishu. Neitoki olAitoriani engAi aitobir engurma te'ngalo e'ngilepunoto, ti atwa Eden: nepik ine oltungani, ilo apa - oitobira. Gen 2.7-8

Neiya olAitoriani engAi oltungani apik atwa ina'gurma e Eden, pe eitobir ninye, neramat. Neitanap olAitoriani engAi oltungani, ajoki, Ore poki'shani otii atwa engurma, aaisho, Inosa anaa eniyeu. Kake ore ilo'shani likintaiyolo isupati o indorok, minos ilnganaiyo lenyena. Gen 2. 15-17

Enjingata o'ngok.

Ore olasurai, naa ngen ninye alang ingwesi poki e'ngota naitobira olAitoriani engAi. Neirorie ninye ina'gitok, nejoki, Ee, ketejo engAi, Eminya ilnganaiyo lo' lgek poki le'ngurma? Nejoki ina'gitok olasurai, Eishoki iyok maainosa ilnganaiyo lo'lgek le'ngurma. Kake ore ilnganaiyo le ilo' shani otii embolos e'ngurma, etiaka iyok engAi, Eminos ilnganaiyo lenyena, nimiseyeye pe mieeyeye. Nejoki ilo'asurai, Esepa mieeyeye endae: ainu ore engAi eiyolo injere ti atwa ina'olong ninosinoso ilnganaiyo le ilo'shani, nebolo ingonyek inyi, nitiuu endae anaa ingaitin aiyolo isupati o indorok. Ore pe edol ina'gitok ilo'shani injere ai sidai te'ndaa, naa keitiship sii ingonyek, naa injere olchani sii ongwaraiyu, oitengen oltungani, neitaiyu ninye ti atwa lelo'nganaiyu lenyena, neinos, neisho sii olmoruo lenye te nebo ninye, nenya sii ninye. Gen 3.1-6

Nejoki olAitoriani engAi ena-gitok, Kaa itaasa iye? Nengamaa ina'gitok, nejo, Ilo'asurai laateleja, nainosa nanu. Neliki olAitoriani engAi ilo'asurai, ajoki, Ore amu itaasa ena'bae, kitediaki iye te'dokoya ingishu poki, o te' dokoya ingwesi e'ngota; naa inkortotari te'ngoshoke ino, naa ingulupuok inya iye ingolongi poki e'ngishon ino: naa kapiki nanu ol o'mangati ereshata iye o ina'gitok, ereshata eishoi ino o eneny; nikiosh ninye elugunya ino, niosh iye entutunyo enye. Nejoki ninye ina'gitok, Kaponiki emion oling e'notai ino, niu ti atwa emion ingera; Ore ekiyeunoto ino, neako ol lo'lmoruo lino, neako ai kintore ninye iye. Nejoki ninye Adamu, Ore amu itoningo oltoilo le'ngitok ino, nina ilnganaiyo le ilo'shani laaitanapa iye, ajoki, Minya ilnganaiyo lenyena: etediaki ena'gop te'ngaraki iye; naa inya iye ilnganaiyo lenyena ingolongi poki e'ngishon ino te'nyamali; nikintubuluaki ilkeko o indulelei e'ndim; ninya iye endiate e'ngurma; ti atwa engininyiret e'ngomom ino, inya endaa ino, metabana nirinyo atwa enderit; amu te ine kitaini: amu aa ira iye enderit, naa irinyokino iye atwa ina'derit. Gen 3. 13-19

Nenangoni abori ilo'asurai sapok, naa ninye olapa'asurai musana, oji olOirirua o Shetani, laa ninye oiminie engop poki. Embolunoto 12.9

Engaraki e nena, anaa enaikunono injere to'regie lo'litungani obo, etejingye ingok engop, o engea sii te ilo'regie lo'ngok; nenoto iltungana poki engea, amu etaasa ingok poki. Roman 5. 12

Entoroni o'litungani, anaa enadolita en engAi.

Kitiu iyok poki anaa indare naimina, nikimbelegenye aim ingoitoi ang maate. Isa 53. 6

Neingor olAitoriani etii shumata, ingera o'litungana ti abori,adol ten aa

ketii oloata engeno, anaoloingoru engAi. Eshomo poki imbat; neitururo poki te nebo, neako il o'loiririoni; nemetii hoo obo oas isupati. Zaburi 14. 2-3

Anaa enatesiraki injere metii osupat obo. Neito eiyolou ninje engoitoi o'soutua: nemeata olturiaki le'ngAi te'dokoya ingonyek enye. . . . Amu eata poki ingok, neitongoro engisia e'ngAi. Roman 3. 10, 17, 18, 23

Eteena isirat indokitin poki ti abori ingok, pe eishori enatejo te'ngirukoto ti atwa Jesu Kristo, lelo poki oiruk. Galatia 3. 22

Enaikuna engAi ten enyoru iltungana.

Amu etonyora engAi engop, neishorua engerai enye nabo, ore oloiruk poki, nemeimin, naa ketum engishon nemeiting. Johana 3. 16

Ti atwa ele-rorei eibalunyeki enyorata e'ngAi ti atwa iyok, injere eiriwaa engAi enGerai enye nabo engop, pe kitum atopok te ninye. Ele'rorei, ninye enyorata, injere me iyok otonyora engAi, kake ninye natonyora iyok, neireo enGerai enye metaa olasar lo'ngok ang. 1 Johana 4. 9-10

Elotunoto enGerai e'ngAi, apa pe elotu engop.

Oloiruki ele'rorei, neitoki aitaiyolo metonyoruni, injere euo Kristo Jesu engop aitajeu iloata ingok. I Tim. 1. 15

Eitaa kewan meata toki, netiu anaa osinga, neitorisioki kewan iltungana.
Filipi 2. 7

Neuo ninye engop, neitobiraki ena'gop engaraki ninye, neito eiyolou engop ninye. Johana 1. 10

Einoto enye.

Ore einoto e Jesu Kristo naa inji eikunono: . . . Neidipaiyu nena poki, pe etum atabai natejo olAitoriani te'ngutuk o'laidetidetani, pe ejo, Engorai, amu kenotaiyu endito, naa keiu engaiyoni, neiboti engarna enye, ajo, Imanueli, laa ten eibalunyeki, injere eboitare engAi iyok. Mataiyo 1. 18, 22-23

Naa keiu engaiyoni, nimbot engarna enye ajo Jesu, amu ninye oitajeu iltungana lenye, to'ngok enye. Mataiyo 1. 21

Engishon enye te ene te ena'gop.

Ninye Jesu le Nazareti otepika engAi eilata to'ITau Sinyati te nebo engolon, oshomo amanaa aas isupati, neishiunye ilomui poki to'loiriruani; amu etii engAi te nebo ninye. Isat 10. 38

Neman Jesu ingangitie poki sapuki, o ingutiti, eisomisha to'ngajijik e'ngAi enye, nelikio ororei supat le'ngarsisisho e'ngAi, neishiunye impukunot o'muijan, o impukunot poki o'ngeatin. Mataiyo 9. 35

Nepwo enetii ninye olorora kitok, netii te nebo ninje ilngojinia, o ilmodook, o ilemeiro, o ilokordo'aik, o ilkulekae kumok, negilaki kung asai, neishiunye ninje ninje. Mataiyo 15. 30

Engea enye naitutumo iyok o engAi.

Etejo, meata injere mepiki enGerai o'Itungani ingaik o' loata ingok, neilili, nepiu te'ngolong e uni aitoki. Luka 24. 7

Ore pe ebaiki ninje eweji neji en e'mborbor, neilili ninye. . . . Nejo Jesu, Papa, tapalaki ninje, amu meiyolo ninje enaasita. Luka 23. 33-34

Etemenaiyoki ninye, neany iltungana; oltungani lo'sinaitin, neiyolo osina oling. . . . Esepa etanapa ninye isinaitin lang, netanapa ilkiyo lang; ore te nena poki nikijo iyok etaaraki, olotaara e'ngAi, neisilisil. Kake etepikaki ninye ilbaa te'ngaraki o'ngitaruorot ang, neidongoki to'ndorok ang; . . . ninkinjiu iyok to'narat enyena. Kitiu iyok poki anaa indare naimina; kimbelegenye poki aim ingoitoi ang maate; eiteleikia olAitoriani shumata ninye indorok ang poki. . . . Eitaiyoki ninye te'ngisilisiloto, neigwenarieki; netaaraki ninye te'ngaraki o'ngitaruorot o'Itungana lainei. Neitobiraki ninje ninje engurare te nebo ilterok, neboitare ninje ilgarsisi te'ngea enye; neito hoo eas ninje entoroni katukul, neito etumi emongoi te'ngutuk enye katukul. Eibugoiye ninye oltau lenye metabaiki 'keeya, neikenaiyoki ninye te nebo lelo'torok; ore te nebo nena netanapa ninje ingok o'Itungana kumok, neitoki aomonoki lelo oitaruo. Isa 53. 3-6, 8, 9, 12

Etua Kristo te'ngaraki o'ngok ang te'risioroto o'lkigerot. I Kor 15. 3

Neitoki Jesu ajoki ninje kat' are, Esepa, esepa, ajoki endae Ara nanu engishomi o'ndare. . . . Ara nanu olchogut supat; neitaiyu olchogut supat engishon enye engaraki o'ndare. Naata nanu ingulye'dare, neme in e ele'ale; nenare nariku ninje, nening oltoilo lai; neako emboo nabo, olchogut obo. Johana 10. 7, 11, 16

Empiunoto enye, o Engilepata enye pe elo Keper.

Nejoki ninye ninje, Etesiraki kuna, injere ketum Kristo emion, nepiu aitoki aingwaa engea, to'ngolongi e uni. Nelikini iloshon poki esirai, o empalakinoto o'ngok, te'ngarna enye. Luka 24. 46, 47

Neitopiuo engAi ninye, te'ngolong e uni, neitadua ninye kewan Kake me to'litungana poki, kake te'shakeni otangasa engAi agelo. Iasat 10. 40, 41

Neitadua kewan ninje, eishu, te'siedi engea enye, to' nduat kumok o'sepat, netadua ninje to'ngolongi artam, nelimu imbaa e'ngarsisisho e'ngAi: . . . Ore pe eidip atejo kuna'baa, neton eingorita ninje, nedumuni ailepye; nengamaa engatamboi, nemekure edolita. Iasat 1. 3, 9

Ninje oitadua iyok to'sesen, neako ninye sinyati to'ltau, nedol ilmalaika ninye, elikiori ti atwa iloshon, neiruki te'ngop, nengamare te shumata te'ngisia. 1 Tim 3. 16

Ore taata eitopiuoki Kristo aitungwaa ilotuata, naa ilnganaiyo le dokoya te lelo otuata. Amu oltungani obo oyaua engea, naa oltungani obo oyaua sii empiunoto o'lotuata. Amu etuata poki engaraki Adamu, neija sii etiu te Kristo, eishori poki engishon. 1 Kor 15. 20-22

Engoitoi e'njeunoto, anaa enaitobirua engAi.

Nejoki ninye, Kaji aiko, pe ajeu. Nejoki ninje ninye, Iruko olAitoriani Jesu, pe ijeu iye. Iasat 16. 30-31

Entejo mikintoki, nishukunyenye, pe ejuti ingok inyi. Iasat 3. 19

E'sirai ya endae ingok, ninjosho meibatisai endae te'ngarna e Jesu Kristo, te'mpalakinoto o'ngok, naa itumutumu endae engishoroto o'ITau Sinyati. Iasat 2. 38

Tini kilimu iyok ingok ang, neitabaiya ninye naa supat, nepalaki iyok ingok ang, neisuj iyok maatungwai poki nemesinya. 1 Johana 1. 9

Amu ten aa imbalunye Jesu te'ngutuk ino, injere ninye olAitoriani, niruk to'ltau, injere eitopiuo engAi ninye aitungwaa engea, nijeu. Amu to'ltau eiruk oltungani, nebaiki isupati, neibalunye te'ngutuk, nebaiki enjeunoto. Roman 10. 9, 10

Amu te'munyani itajeutuo endae, ti atwa engirukoto: neme endae maate: engishorunoto e'ngAi. Efeao 2. 8

Amu ore poki ngae oiboten garna o'IAitoriani, nejeu. Roman 10. 13

Ore poki naaisho Papa, nepwonu ninje engalo ai; ore ololotu enatii, nemanangaa katukul. Johana 6. 37

Naa ena engishon nemeiting, nikitaiyoloito ninje lye, injere lye ake engAi nasepa, o ilo liriwa lye, laa ninye Jesu Kristo. Johana 17. 3

Elakunoto te'ngoitoi o'sarge lenye.

Kake ore taata, ti atwa Kristo Jesu, endae olakwaniki apa eitinyikuaki endae to'sarge le Kristo. Efeso 2. 13

Neituku iyok osarge le Jesu, enGerai enye, maatungwai ingok poki. 1 Johana 1. 7

Amu eitisip Menye ten etoni inabore poki ti atwa ninye; neitaiyo osotua ti atwa osarge, to'lchata lenye ogorishorieki. Kolosai 1.19-20

Niyolouu, injere eito elakuni endae, to'ndokitin naruoyo, anaa fetha ana sahabu. . . . Kake to'sarge kirotet, naa ninye osarge le Kristo. 1 Petero 1. 18-19

Laa ninye, kinotie elakunoto, ti atwa osarge lenye, empalakinoto o'ngok ang, te'risioroto engarsisisho e'munyani enye. Efeso 1. 7

Amu ore engishui o'sesen, netii atwa osarge, aisho endae ilo'sarge to'lasari entobirie engitutumore te'ngaraki o'Itauja linyi. Leviticus 17. 11

Naa ten etii oltungani atwa Kristo, naa endoki ngejuk ninye; etulusoitye indokitin musan; neako indokitin poki ngejuko. II Korinsio 5. 17

OITau Sinyati.

Naa kaomon nanu Papa, naa keisho ninye endae lekae'Aretokinoni, pe eton te'nebo endae endarasi. Naa oITau lo'sepat; lemeidim engop anoto, amu medol ninye, nemeiyolo ninye kake iyololo endae; amu eton ninye ti atwa endae, naa kejing ninye atwa endae. Johana 14. 16-17

Kake ledo'Aretokinoni, oITau Sin yati oireo Papa, te'ngarna ai, neitaiyolo endae indokitin poki, neitadamu endae indokitin poki natiaka endae poki. Jobana 14. 26

Nimintagorigoro olTau Sinyati le'ngAi, injere etepikaki endae olmishere metabaiki engolong e'lakunoto. Efeso 4. 30

Enjomey olTau, nimintabaiyaya ingolati o'sesen. Galatia 6. 16

Amu ore lelo poki otoriko olTau le'ngAi, ninje ingera e'ngAi. Roman 8. 14

Entaboreiya to'ITau. Efeso 5. 18

Kake ore ilnganaiyo lo'ITau, naa enyorata, o engeda, osotua, o engiriata, o engitobirata o'mbaa, o isupatisho, o engirukoto, o emboron, o engiboroto o'mbaa, nemetii ingulye'gitanapat nalusoo te'nena. Galatia 6. 22, 23

Esinyatisho.

Amu ore enaiyeu e'ngAi, naa esinyatisho inyi. 1 Sesaloniki 4. 3

Intisinya ninje to-sepat; naa ororei lino ninye isepat. Johana 17. 17

Amu ore ilo oitisinyaki, o lelo oitaa sinyat, eingwaa ninje poki atwa obo: naa te'ngaraki e ina meinos anyet, ten ejo ilalashera. Hebrania 2. 11

Neija sii endae, ingena aate injere ituata to'ngok, kake injushu te'ngAi ti atwa Kristo Jesu. Roman 6. 11

Kake ore taata eidipaki atalako endae entungwai ingok, niakoko isingan le'ngAi, niatata ilnganaiyo linyi obaiki esinyatisho, ore engitingo. to, naa engishon nemeiting. Roman 6. 22

Naa ore ina'Ai o'sotua, e'njoo ninye meituku endae tukul iltauja linyi, o ingishui inyi, o iseseni linyi, pe miatata endae endioto te'lotunoto o'I Aitoriani lang, Jesu Kristo. Eitabaiya elde oiboto endae, naa keas sii ninye ina. 1 Sesaloniki 5. 23-24

Engomono.

Ore endoki poki niomonunu te'ngarna ai, naa kaitaas nanu endae, pe etumi aisisie Papa enGerai. Tin inkilikwanunu endae endoki te'ngarna ai, naitaas endae. Johana 14. 13-14

Tin itonini endae ti atwa nanu, neton ororei lai ti atwa endae, ninkilikwanunu endoki niyeuu, naitaas endae. Johana 15. 7

Neton eito inkilikwanunu 'toki, te'ngarna ai; entoomonu pe eishori endae.
Johana 16. 24

Ore poki'toki niomonunu, e'ruko injere inoto, niatata. Marko 11. 24

Niomono engAi ingatitin poki te', ngomono o engishirata ti atwa olTauniripopo
ingatitin poki te'ngomono isinyat poki. Efeso 6. 18

Entoomon engAi mingashingasha. 1 Sesaloniki 5. 17

Engisiaiata o Engiriata.

Nejoki Jesu ilkipaareta lenyena, Ten eiyeu oltungani naasuj, nemenaa kewan,
nedumu olchata lenye ogorishorieki pe asuj. Mataiyo 16. 24

Eidim engAi aiyao shumata endae emunyani poki, pe iboreiyuyu to'ndokitin poki
ingolongi poki, pe itumutumu atulusoi te'siai supat. II Korinsio 9

Engaraki ena, ilalashera lainei, entasheito, emiseoseo, entaiyetu esiai ti
atwa olAitoriani, ingatitin poki, amu iyololo injere me en e'pesho esiai inyi
ti atwa olAitoriani. I Korinaio 15. 58

Amu eishoki endae engaraki e Kristo, neme tin iruki ninye ake, kake kinyali
sii engaraki ninye. Filipi 1. 29

Kake ten aa keishori endae osina engaraki o'supati, imaiyanana endae;
nimiureishoyuyu, ana ingaingaiyaya. I Petero 3. 14

Ten aa keibotokini endae to'ndorok, engaraki engarna e Kristo, imaiyanana; amu
ore oltau le'ngisia, o oltau le'ngAi neton shumata endae. 1 Petero 4. 14

Enaikuna engAi ten emit eomonoto o ingitanyanukoto, neme engAi.

Ara nanu olAitoriani engAi ino, ilo likintaiyo te'ngop e Misiri, nikintungwaa
ina'aji e'singaisho. Miata gulye'aitin, neme nanu katukul. Mintobir
engitanyanyukoto nagwetuni, ana engitanyanyukoto e'ndoki natii shumata keper,
ana enatii abori ena'gop, ana en e'ndoki natii atwa engare. Misai
nena'dokitin, ana isiai, amu nanu olAitoriani, engAi ino. Exodus 20. 2-5

Amu ore ingaitin o'loreren poki, naa ingitanyanyukot; kake olAitoriani
oitobira shumata. Zaburi 96. 5

Kiyolo ajo me 'toki nena'gitanyanyukot te'ngop, nikiyolo ajo metii ae'Ai, neme nabo ake. I Korintio 8. 4

Kiata iyok engAi nabo, naa ninye Papa, oata indokitin poki, nikitii iyok atwa ninye; olAitoriani obo Jesus Kristo; aa ninye indokitin poki, nikitii iyok atwa ninye. 1 Korinsio 8. 6

Nejoki Jesu ninye, Shomo, tungwaiyoki oloirirua, amu etesiraki injere, toomono olAitoriani engAi ino, naa ninye ake openy isiai. Mataiyo 4. 10

Entoshorto irobot inyi natii shumata engop, naa engibora o'ngonyek, o iloiririoni, o engwarata torono, o ilderat torok, o engwarata ningwaring wara, o eomonoto o'ndokitin neme engAi: engaraki e kuna'baa nelotu engoro e'ngAi shumata ingera o'lemeiruk. Kolosai 3. 5-6

Embatisho natumi, ten eanyi enjeunoto e'ngAi.

Kaji kingu iyok, pe kijeu, tini kidol ajo gitit enjeunoto sapok nabanji?
Hebrania 2. 3

Ore oloiruk enGerai, neata engishon nemeiting; kake ore olemeiruk enGerai, nemedol engishon; kake engoro e'ngAi naton te shumata ninye. Johana 3. 36

Ai ngae oishiraka endae, pe impiriri, aingwaa engoro nalotu? Luka 3. 7

Ore elde ongere amir, nejung kuna'baa; naako nanu engAi enye, neako ninye engerai ai. Kake ore iloureisho, o lelo lemeiruk, o iloisho osina, o ilarak, o ilololoito, o ilosakutisho, o ilomon iloipi leme engAi, o ilaimongok, netum ninje ematwa enye ti atwa ina'aiposha napejisho te' ngima, o engibiriti, naa ninye ina'gea e are. Embolonoto 21. 7-8

Enjeunoto najeunyeki, o indorok o'lairirua.

Nepurd ina'Ai o'sotua Shetani ti abori ingejek inyi asioki. Roman 16. 20

Enjoo enashe Papa. . . . Otalakua iyok maatungwai engolon e'naimin, neibelegenyaki iyok engarsisisho e'nGerai enye kirotet. Kolosai 1. 12-13

Engaraki e ina, pe etaboluuki enGerai e'ngAi, pe eitaruo ninye isiaitin e Shetani. 1 Johana 3. 8

OlAitoriani lang, Jesu Kristo, oitaiyo kewan engaraki o'ngok ang, pe etum aitajeu ninye iyok te ena'kata ena, gop torono, te'risioroto enyorata e'ngAi,

Papa lang: laa enenye engisia indaras o endarasi. Esai. Galatia 1. 3, 4, 5

Enjopo inareta nabaiya engAi, pe indimidimi aitasheito airesha ingoloti e Shetani. Efeso 6. 11

Kinjoo engAi enashe, naisho iyok maatimiri ti atwa olAitoriani lang, Jesu Kristo. I Korinsio 15. 17

Erinyunoto e Jesu Kristo.

Naa kaitoki ashukunye, angamaa endae makewan: ore enatii nanu, naa ine itii sii endae. Johana 14. 3

Ele ninye Jesu oiwaki aitungwaa endae aiyaa shumata, naa keshukunye aikunonye inji anaa enitaduaitye ninye eshomo shumata. Iasat 1. 11

Amu kedou olAitoriani openy, aingwaa shumata, to'ltoilo sapok, oltoilo lo'lmaika kitok, te nebo emouo e'ngAi; ore lelo otuata ti atwa Kristo, nepiu ninje te'dokoya; Kake ore iyok iloishu otongaiyoki, nedumuni ailepye te nebo engatamboi, nikinangare olAitoriani te shumata: nikiboitare iyok olAitoriani endarasi. I Sesaloniki 4. 16-17

Kake kiyolo injere, ten elotu ninye, nikitiu iyok anaa ninye; amu kidol ninye enaikunono ninye. 1 Johana 3. 2

Entengenuoto, amu miyololo engolong nalotu olAitoriani linyi. . . .

Entengenuoto sii endae, amu te'ngata nimimbarteshosho, elotu enGerai o'Itungani. Mataiyo 24. 42, 44

E'ngorai, nanu olotu asioku, naata elaakinoto ai te nebo nanu, nalaki pokit'ungani te'risioroto enaikunono esiai enye. Embolunoto 22. 12

Esai, Wou olAitoriani Jesu. Embolunoto 22. 20

Naa ilguti ake lelo'rorei oingwaa embuku naji Biblia, embuku e'ngAi. Neata ina 'buku kulekae'Rotei kumok lo'Sepat. Neidim oltungani lo'IMisheni ana ilo lo'lduka le'mbu kuikintaduaki iye ina' buku, o eweji nindim anoto teh aa iyeu ninye.

